

焦氏筆乘

焦氏筆乘卷五

秣陵焦竑弱侯輯

門人謝與棟吉甫

男焦尊生茂直

校

醫方

梁溪漫志云陸宣公在忠州哀方書度日非特假此避禍蓋仁人之用心也前輩名士往往能醫非特衛生亦可及物本草單方近已刻於四明然唐宋人文集及雜說中名方尚多未見有類而傳之者予屢欲爲之恨藏書不廣倘有能用予言集以

傳諸人亦濟物之一端也

此言甚合余意讀書之餘隨疏記數則尚俟同

志者廣之

許道幼以母疾覽醫方遂號名醫戒諸子曰爲人子者嘗膳侍藥不知方術可謂孝乎

一方士嘗貨藥淮西值兵變竄入深山中遇老姥年二百許歲自謂金亡避兵來此元完顏氏之醫姥也傳以背瘡方用射干一味俗名地扁竹是也原花園中物葉如良薑根如竹鞭其色初開如金狀每用小錢抄末三字許溫酒調服病在上卽微

吐在下卽微瀉功效如神仍用膏藥收口又傳壽
星散專治惡瘡痛不可當者糝之不痛不痛者糝
之卽知痛大南星一味爲末如背瘡大痛者遍糝
於上卽得安卧不痛者糝之知痛卽可治也養生主論
瘍醫公孫知叔記問該博深明百藥之性創造五
毒之劑取丹砂養血而益心雄黃長肉而補脾礬
石理脂膏而助肺磁石通骨液而壯腎石膽治筋
而滋肝外療瘡瘍之五證內應五臟拘之以黃堊
熟之以火候藥成傳瘍無不神效一人鬢有疽一

夕決潰勢欲殆以前藥傳之應手而差

推蓬寤語

治目障翳以熊膽少許淨水略調開盡去筋膜塵
土入冰腦一二片或淚痒加生薑粉以銅筋點之
赤眼亦可用

齊東野語

治疔以薏苡仁用東方壁土炒黃色然後水煮爛
入鍋盆內研成膏每用無灰酒調下二錢卽消

宋張

世南游
宦紀聞

昔有人與奴俱得心腹病奴死剖腹視之得一白
蠶以諸藥內蠶口中終不死後有乘白馬來者馬

溺濺鼈縮頭藏脚試取溺灌之豁然消成水主人
頓飲一升而愈

志惟

吳廷紹爲太醫令先主因食飴喉中噎醫莫能爲
廷紹獨謂當用楮實湯一服疾良已馮延巳苦腦
中痛延紹密詰厨人曰相公平日嗜何等曰多食
山雞鷓鴣廷紹曰吾得之矣治以甘豆湯亦愈或
叩之答曰噎因甘起故以楮實湯治之山雞鷓鴣
皆食烏頭半夏故以甘豆湯除其毒耳聞者大服

江表
志

褚澄善醫李道念有冷疾五年澄曰汝病是食白
淪雞子過多取蘇一升令煮服之吐一物如升涎
裹之乃是雞雛羽翅爪距皆見凡十三頭而病愈
南史

陳可大知肇慶府肋下忽腫起如癰狀頃之大如
盃識者云此中挑生毒也俟五更以菴豆嚼試若
香甜則是已而果然使搗川升麻取冷熟水調二
大盞服之遂洞下瀉出生蔥數莖根莖皆具癰卽
消續煎平胃散調補且食白粥經旬復常

夷堅志

雷州康財妻爲蠻巫林公榮用雞挑生值商人楊
一者善醫與藥服之食頃吐積肉一塊剖開筋脉
中有生肉雞形已具康訴於州捕林寘獄而呼楊
令具疾證及所用藥略云凡喫魚肉瓜果湯茶皆
可挑初中毒覺胸腹稍痛明日漸加攪刺滿十日
則內物能動騰上則胸痛沉下則腹痛積而瘦悴
其候也在上鬲則取之法用熱茶一甌投膽礬半
錢于中候礬化盡通口呷服良久以雞翎探喉中
卽吐出毒物在下鬲則瀉之以米飯下鬱金末三

錢毒卽瀉下乃以人參白朮末各半兩同無灰酒半升納餅內慢火熬半日許度酒熟取出溫服之日一杯五日乃止

夷堅志

宋英宗書齒藥方生地黃細辛白芷蛙皐角各一兩去黑皮并子入餅中用黃泥固濟炭火五六月煅令炭盡入白殭蠶一分甘草二錢并爲細末早晚用揩齒牙堅固并治衄血動搖等疾

宋周密雲烟過眼錄

梁武發熱服大黃姚僧坦曰大黃快藥至尊年高不宜輕用帝弗從遂至危篤及梁元有心腹病諸

醫請用平藥僧垣曰脉洪實宜用大黃帝從之果
下宿食而疾愈

梁書

許胤宗仕陳爲新蔡王外兵叅軍王太后病風不
能言醫家告術窮胤宗曰餌液不可進卽以黃芪
防風煮湯數十斛置牀下氣如霧重薄之是夕語
馬監場云泉州一僧能治金蠶蠱毒如中毒者先
以白礬末令嘗不澁覺味甘次食黑豆不腥乃中
毒也卽濃煎石榴皮汁飲之卽吐出有蟲皆活無
不愈者

西溪叢語

許叔微精於醫云五臟蟲皆上行唯有肺蟲下行最難治當用鰾爪爲末調藥於初四初六日治之此二日肺蟲上行也

西溪叢語

體中多不快亦是血氣未定時失調護耳某二十四五時正如此病因服兔絲遂健啖耐勞今寄方去兔絲子淘擇淨焙乾秤九兩準一勝用好法酒不用煮酒一升浸三日許日中曬時時翻令瀝盡酒薄攤曬乾甕器貯之每日空心抄一匙溫酒吞下久服不令人上壅服三兩月其啖物則如湯沃

雪半歲則大肥息矣覺氣壅則少少服麻仁丸可也往歲嘗傳此法與京西李大夫人服不輟昨任秘書少監與同省啖物作勞如少年人也已七十四五矣

山谷刀筆

婦人多兒女之態外間事不須每令知也古方有治百合病者云意欲飲食復不能食欲臥復不能臥欲出行復不能出行飲食或有美時或有不聞食氣時如寒無寒如熱無熱身形如和其脉數四物湯加百合等分同煎煎成鍊鐘乳一大錢計

三兩日中可知

山谷刀筆

聞苦下痢知向安矣但少服攻擊之劑調飲食之
味日日全矣赤石脂末二錢搜白麩二兩半切三
刀子軟煮調和羊清汁食虛劣人不過兩服卽成
藏府矣河魚丸用大芎二兩神麴二兩炒爲細末
湯浸烝餅丸如桐子大每五十丸薑湯下桃紅丸
赤石脂二兩細研泡裂乾薑末二錢和勻湯浸烝
餅丸如桐子大每百丸濃粥飲下日三服

山谷刀筆

韭多補洩子甚溫俗呼草鐘乳真誥云務光服韭

煎以入清泠之淵也

茄子根煎湯浴足能治竈瘡

竈瘡足跟凍瘡也

蛇蛻塞兩耳治瘡疾覆盆子是莓子竿取汁合成膏塗髮不白麀鹿非八卦辰屬不輦臙能溫補於人生死無尤道家聽用爲脯

鼈爲臙數食可長髮

以清水漱口飲酒至斗不亂或曰酒毒自齒入也木瓜性益下部若脚膝筋骨有疾者必用焉故方

家號爲鐵脚梨

清異錄○段文昌銀稜木瓜胡樣桶濯足蓋木瓜樹解合爲桶也

木瓜味酢善療轉筋陶隱居云如轉筋時但呼楸
名及書上木瓜字輒愈

蜘蛛網纏贅疣七日消爛屢有驗

粳粟米五穀中最硬得漿水易化倉粳米炊作乾
飯食之止痢

小兒瘡痂以榕粉日傅之則易差而無痕

汗漫錄

重午日午時有雨則急砍一竿竹竹節中必有神
水瀝取和獺肝爲圓治心腹塊聚等病

金門歲節

王凝守會稽童貫時方用事貫苦脚氣或云楊梅

仁可療是疾薺裒五十石獻之後擢待制

揮塵錄

薺黃茅根也煎汁治消渴

枕林伐山

段成式云龍腦香出波律國樹高八九丈可六七尺圍乾脂爲香清脂爲膏子主內外障眼又有蒼龍腦不可點眼經火爲熟龍腦

續博物志

南荒生筴竹長百丈圍三丈五尺可以爲大船其味美張華注子筴煮而食之可以已創厲

物類相感志

抱朴子云槐子服之補腦令人髮不白而長生

庾肩吾常服槐實年九十餘目看細書鬢髮皆黑

病疽者但有痛處或有頭或無頭但用大瓣蒜切令厚二分許貼瘡上用麥粒大艾炷灸每灸至十五六壯可換一餅子極甚者可灸至二百壯許但灸勝不灸也灸了服托裏散散用菉豆粉四兩乳香一兩極細每服二錢新汲水調下覺熱躁日三服不妨瘡可用追風散洗龍骨五倍子二兩飛礬一兩爲末每二錢沸湯泡取清者乘熱淋洗洗了用官藥局雲母膏貼毒勢盛者日再洗換膏藥如

壯熱頭疼瘡根極痛可用大木薜荔二百葉爛研用酒一升杵攪拌裂取汁煎一沸隨宜取盡未解再服三服不妨雖氣弱人且去瘡毒爲上

山谷刀筆

中多用之

豐寧傳

冬瓜仁七升以絹袋盛之投三沸湯中暴乾如此三度苦酒浸一宿爲末日服方寸匕令人不老雷公炮炙論載一藥而能治重疾者今醫家罕用之聊志於此其說云髮眉墮落塗半夏而立生目

辟眼瞤有五花而自正

五加皮

脚生肉杕視繫宕根

囊皺旋多夜煎竹木

草薺

體寒腹大全賴鸕鷀血

泛經過飲調瓜子欬逆數數酒服熱雄遍體癰風

冷調生側

附子旁生者

腸虛泄利須假草零久渴心煩

宜投竹瀝除癥去塊全仗硝礪益食加觴須煎蘆

朴強筋健骨酒送菰鱠駐色延年精蒸神錦知瘡

所在口點陰膠產後肌浮甘皮酒服腦痛急投硝

末心痛速覓延胡

容齊隨筆

扁鵲見秦武王示之病扁鵲請除左右曰君之病

在耳之前目之下除之未必已也將使耳不聰目
不明扁鵲怒而投石曰君與知之者謀之而與不
知者敗之

國策

東坡曰士大夫多秘所患以驗醫能否使索病於
冥漠之中吾平生求醫必盡告以所患然後診之
故雖中醫治吾疾常愈吾求疾愈而已豈以困醫
爲事哉

唐傳張臯疏人無故不應餌藥出千金方序論云
病患已成須勤藥餌故立補養之方平人無事不

宜着手

芥隱筆記

月令仲夏日鹿角解仲冬日麋角解鹿以夏至隕
角而應陰麋以冬至隕角而應陽鹿肉暖以陽爲
體麋肉寒以陰爲體以陽爲體者以陰爲末以陰
爲體者以陽爲末末者角也故麋茸補陽利於男
子鹿茸補陰利於婦人見王楙所著甚明今人不
惟一槩作男子補精益血之劑於麋鹿亦不能辨
矣

卮言

馬火也故將火而夢馬火就燥燥而不已則窮故

膏油所以爲無窮也藥之膏油者無如地黃啖老馬皆復爲駒樂天采地黃詩云與君啖老馬可使照地光今人不復知此法吾晚學道血氣衰耗如老馬矣然多食生地黃而不可常致此藥以二八月采者良如許以此時寄惠爲幸欲烹爲煎也

集

東坡

成化二十一年新野疫癘大作死者無虛日鄰人樊滋夫婦臥牀數日矣余自學來聞其家人如殺羊聲不暇去衣巾急往視之見數人用絺被覆其

婦牀下致火一盆令出汗其婦面赤聲啞幾絕余
叱曰急放手不然死矣衆猶不從乃強拽去被其
婦躍起倚壁坐口不能言問曰飲凉水否領之與
水一盃一飲而盡始能言又索水仍與之飲畢汗
出如洗明日愈或問其故曰彼發熱數日且不飲
食腸中枯涸矣以火烝之速死而已何得有汗今
因其熱極投之以水所謂水火既濟也得無汗乎
觀以火然枯鼎雖赤而氣不升注之以水則氣自
來矣遇此等證者不可不知

夢醒錄

解叔謙母疾夜於庭稽顙聞空語曰得丁公藤爲
酒便差訪醫及本草注無識者乃至宜都郡見山
中老公伐木問所用答曰此丁公藤療風尤驗叔
謙拜伏流涕具言來意此公愴然以四段與之并
示漬酒法叔謙受之顧視此人不復知處依法爲
酒母病卽差

朝野僉載泉州盧元欽患大風唯鼻未倒五月五
日取蟬蛇膽欲進或云肉可治風遂一截蛇肉食
之三五日頭覺漸可百日遂平復

荆楚歲時記云野人以五月五日得喙木鳥貨之
主齒痛淮南子亦云斲木愈齩

太平廣記趙延禧遭惡蛇所螫處貼蛇皮便於其
上灸之引去毒氣卽止

宋朝類苑載楊岨瘍生於頰連齒輔車外腫若覆
甌膿血內潰痛楚甚療之百方不差或語之曰天
官瘍醫中有名方何不試用岨按瘍醫註疏中法
製之用藥注瘡中少損朽骨連牙潰出遂愈按周
禮瘍醫掌腫瘍潰瘍金瘡折瘍之祝藥副殺之齊

凡療瘍以五毒攻之所謂腫者壅腫也潰者膿血
溢也金者刃傷也折者傷損也祝讀如注以藥傳
著之也剮刮去膿血也殺去其惡肉也齊與劑同
五毒五藥之有毒者石膽一丹砂二雄黃三礬石
四磁石五用黃堞實五石其中燒之三日夜其烟
上著以雞羽掃取之以注瘡惡肉破骨盡出黃堞
黃堞器也此當爲後世醫方之祖

前公孫知叔卽此方非其創造也

李延壽北史有楊愔塗腫法用礬黃石如鷺鴨卵

大者猛火燒令赤納醇醋中自有石屑落醋裏頻
燒至石盡取石屑暴乾搗篩和醋以塗腫上無不
愈

酉陽雜俎一方用井口邊草着母卧薦下勿令人
知能止小兒夜啼

歐陽公與梅聖俞書失音記得一方將槐花干新
瓦上炒熟置懷袖中隨處送一二粒口中咀嚼之
使喉中常有氣味久之聲自通

梅聖俞和吳正仲赤目見寄詩云暫看朱成碧難

逢扁與和金匱舊孰在訶子古方磨目注云葛洪
治赤目翳膜方訶子一枚以蜜磨注目中

江少虞皇朝類苑有西岳蓮花峰神傳齒藥方序
曰元亨在大聖中結道友登岳頂至明星館故址
得斷碑數片髣髴有古文洗滌之得歌一首曰豬
牙皂角及生薑西國升麻蜀地黃木律旱蓮槐角
子細辛荷葉要相當青鹽等分同燒煨研細將來
使最良揩齒固牙髣髴黑誰知世上有仙方荷葉
下注云剪荷葉心子也慮歲月浸久剝裂不完因

錄以歸朝之名卿巨公皆傳之脩用其效響應
江鄰幾雜志云上在青官苦腮腫用赤小豆爲細
末水調傅腮上遂愈

遜齋閑覽云淮西士人楊勔中年得異疾每發言
腹中輒有小聲效之數年其聲漸大有道士見而
驚曰此應聲蟲也久不治延及妻子可讀本草遇
蟲所不應者當取服之勔如其言讀至雷丸忽無
聲乃頓服數粒遂愈

夷堅志云時康祖患心漏二十年當胸數竅血液

常流屢訪名醫皆云不可治又積苦腰痛行則偃
僂韓子溫爲檢聖惠方腰痛門冷熱二證方示之
俾自擇焉康祖自以年老羸弱取其熱劑用鹿茸
附子鹽花三分爲末棗肉丸之每服三十丸空心
酒下服之月餘腰屈復伸心漏隨愈且精力倍昔
其後有吏吳汝弼苦是疾服之亦愈此方本治腰
痛不知其效乃爾徧告世之醫者皆不測其故
洪輯幼子佛護病痰喘醫不能治凡五晝夜不乳
食危甚夢一婦人告之曰何不服人參胡桃方覺

而依其言煎湯灌兒一蜺殼許喘定再進遂得睡
三進而愈此藥不載於方書蓋人參定喘而帶皮
胡桃則斂肺也予素痰疾因晚對孝宗諭以胡桃
肉三顆生薑三片臨臥服之畢卽飲湯三兩呷又
再嚼桃薑如前數且飲湯勿行動旣就枕旣還玉
堂如旨服之申旦而嗽止疾不復作輯之事亦類
此

胡陽公主難產方士進枳殼四兩甘草二兩爲末
每服空心大錢匕如茶點服自五月後一日一服

至臨月不唯易產仍無胎中諸惡病

抱朴子云趙瞿病癰歷年醫不差家乃賫糧送弃
山穴中瞿自然不幸悲嘆涕泣經月有仙人經穴
見而哀之具問其詳瞿知其異人也叩頭自陳乞
命於是仙人取囊中藥賜之教其服百餘日瘡愈
顏色悅肌膚潤仙人再過視之瞿謝活命之恩乞
遺其方仙人曰此是松脂彼中極多汝可鍊服之
長服身轉輕力百倍登危涉險終日不困年百歲
齒不墮髮不白夜臥常見有光大如鏡

李旼該聞集云爆竹辟妖氣鄰人有仲叟家爲山鬼所祟擲瓦石開戶牖不自安叟求禱之而妖祟彌盛旼謂之曰翁旦夜於庭落中若除夕爆竹數十竿叟然其言爆竹至曉寂然安帖遂止

茯苓久服之顏色悅澤能滅癰痕抱朴子云任子季服茯苓十八年玉女從之能隱能彰不食穀灸癰滅面生光玉澤

唐書李百藥傳云百藥勸杜伏威朝京師旣至歷陽中悔欲殺之飲以石灰酒因大利頓欲死旣而

宿疾都除

抱朴子內篇古太墓中多石灰汁夏月行人有瘡者見墓中清水用以洗浴瘡自愈於是諸病者聞之悉往洗傳有飲之以治腹內疾者

朝野僉載云定州人崔務墜馬折足醫者令取銅末和酒服之遂平及亡後十餘年改葬其經骨折處猶有銅束之

四明溫台間山谷多產菌然食之間有中毒往往至殺人者蓋蛇虺毒物所熏烝也一僧教使掘地

作坑以新汲水投坑中攪之令濁少頃待其澄清
取飲卽解居山者不可不知黃休復客話亦載此
宋戶部尚書沈誥爲人仁厚一兵卒患背疽乞假
親爲合藥治之時旱蝗當致齋園丘猶丁寧料理
藥內當用酒恐市酤不中用自取酒入藥服之卽
愈其法用瓜蒌子一枚乳香沒藥各五兩甘草三
錢用醇酒九盞臨服嚼沒藥一塊飲此酒極妙見
韋航紀談

周密志雅堂雜鈔治喉閉方用竹紙滲巴豆油令

滿作紙撚點燈旋吹滅之以烟薰喉間卽吐惡血而消

齊東野語云辛丑余侍親還自福建途中有病疾閉者老醫傳一方用鴨嘴膽礬一味研極細醎醋調灌之藥甫下咽大吐去膠痰卽差然膽礬難得真者不可不預儲以備急也

廣五行記永徽中絳州僧病噎不下食告弟子吾死之後便開吾胸視有何物言終而卒弟子依言開視胸中得一物形似魚而有兩頭遍體肉鱗弟

子致器中跳躍不止戲以諸味皆隨化盡時夏中
藍盛作澱一僧以澱致器中此蟲遂遶器中走須
臾化爲水矣

東坡仇池筆記治內障眼熟地黃麥門冬車前子
三味爲細末蜜丸如梧桐子大本草云三物相雜
治內障眼有效屢試信然三物皆難搗羅和合異
常甘香真奇藥也

朱子云予嘗中鳥喙毒始時頭岑岑然久之加煩
懣正如淳于衍毒殺許后之證當時在深山中不

能得藥須臾徧身皆黑勢甚危意必死矣偶記漢
質帝語得水尚可活亟令人多汲新水連飲之遂
大嘔洩而解此亦不可不知也

虞雍公允文紹興中自衢州守召至臨安憩北郭
外接待院因道中冒暑得泄痢連月重九日夢至
一處見一人被服如仙官延之坐視壁間有韻語
藥方一紙曰暑毒在脾濕氣達腳不瀉則痢不痢
則瘡獨煉雄黃蒸餅和藥甘草作湯服之安樂別
作治療醫家大錯夢回尚能記之如其方服之遂

愈

太平廣記貞觀中太宗苦氣痢衆醫不效詔問殿
庭左右能治此疾者當重賞之有術士進以牛乳
汁煎葦撥服之立差

焦氏筆乘卷之五

焦氏筆乘卷六

秣陵焦竑弱侯輯

門人謝與棟吉甫

男焦尊生茂直

校

鄭夾漈論六書

鄭夾漈六書略有云書有古今殊文者如黃帝貨
貨作斤帝嚳貨貨作𠂔高陽貨貨作忻又作𠂔之
類是也有一代殊文者如太昊金昊作𠂔又作𠂔
高陽金高作𠂔又作𠂔又作𠂔又作𠂔
𠂔又作𠂔之類是也有諸國殊文者如晉姜鼎通

作殳甬姜鼎通作祖宋公鼎公作公魯公鼎公作
𠂇之類是也觀此則諸儒以義理說文字者皆非
矣夫一貨可說也二貨三貨至於十三貨何說乎
既有十三文豈亦有十三義乎一高可說也二高
三高至於六高何說乎既有六文豈亦有六義乎
況此文盡出聖人之手豈聖人無義而秦人史隸
之書反有義乎大抵書以記命爲本豈在文義以
義取文者書之失也

左氏曰止戈爲武武非从止如止𣎵齒𣎵之類从

止武从戈从亾从戈以見義从亾以見聲古文舞
作𠄎撫作𠄎廡作𠄎於古並从亾於今並从無而
無於篆文亦从亾則武之从亾如戰之从單善戮
之从𠄎六戢之从𠄎緝殘之从癸皆聲之諧也記
曰祖者且也祖非从且凡置姐之類从且徂祖之
類从且徂祖無且義又曰荆者荆也若荆之若井
而有例之義則𠄎也井也耕也亦可曰荆乎又曰
富也者福也若富之从畐而有福之義則幅也幅
也副也亦可曰福乎若曰角觸也商章也秋之爲

卷六
二
擊春之爲蠹皆此類也是皆不識諧聲

左氏曰反正爲乏正無義也正乃射侯之正象形也正以受矢乏以藏矢正相反也邪正之正無所象故正用侯正之正邪用琅邪之邪並協音而借是假借之書也韓子曰自營爲厶私厶非自營之義也厶於篆象男子之勢故又音烏与了是象形之文若自營之厶与了絕之了並同音而借亦假借之書疊古作疊祭肉之積在器也从晶精象積肉形宜祭器也楊雄以疊爲古理官決罪三日得

其宜乃行故从三日从宜此亦不識象形者也能象熊之形許氏謂能熊屬則可矣又曰賢能之能何也出象花英之形許氏謂象草木益滋上出則可矣又曰出進何也是皆惑象形於假借者也三代之前有左氏韓子三代之後有楊雄許慎猶不逮六書之義況其他乎

熊朋來論六書

熊朋來曰古初制字多象形故象形爲六書之首形不可象而指事事不可指而會意意不可會而

諧聲聲無可諧五不足而後假借世間文字雖多
玉篇諸部不過二萬七千七百二十六字夾漈六
書略凡二萬四千二百三十五字於內諧聲二萬
一千三百四十一字是諧聲居六書十分之九矣
漢字猶有有聲無字者番字則皆諧聲矣荆公字
說則字皆會意無復六書矣故王氏周禮新經至
六書無可說

用脩論轉注

六書當分六體班固云象形象事象意象聲假借

轉注是也六書以十爲分象形居其一象事居其二象意居其三象聲居其四假借借此四者也轉注注此四者也四象以爲經假借轉注以爲緯四象之書有限假借轉注無窮也鄭漁仲六書考論假借極有發明至說轉注之義則謬以千里矣原轉注之義最爲難明周禮注云一字數義展轉注釋而後可通後人不得其說遂以反此作彼爲轉注許慎云轉注考老是也毛晃云老字下從匕音化考字下從丂音巧各自成文非反考爲老也王

栢正始之音亦以考老之訓爲非蕭楚謂一字轉其聲而讀是謂轉注程端禮謂假借借聲轉注轉聲皆合周禮注展轉注釋之說可正考老之謬矣又易疏云賁有七音義各不同觸類而長之衰有四音齊有五音從有七音差有八音敦有七音辟有十一音皆轉注之極也

周官六書之名曰象形指事會意諧聲假借轉注舊矣然不若班固象形象事象意象聲之說因名而可以得其義也固意謂六書四者有象可見故

以象名假借轉注則隱於四象之中而非別有字也或問假借轉注將無同乎曰假借借義不借音如兵甲之甲借爲天干之甲魚腸之乙借爲天干之乙義雖借而音不變故曰假借轉注轉音而注義如敦本敦大之敦旣轉音頓而爲爾雅敦丘之敦又轉音對爲周禮玉敦之敦所謂一字數音也假借如假物於隣或宋或吳各從主人轉注如注水行地爲浦爲淑各有名字矣是奚可同哉

趙古則轉注論曰轉注者展轉其聲而注釋爲他

字之用者也有因其意義而轉者有但轉其聲而無意義者有再轉爲三聲用者有三轉爲四聲用者至於八九轉者亦有之其轉之法則與造諧聲者相類有轉同聲者有轉傍聲者有雙音竝義不爲轉注者又有傍音協音不在轉注例者吳棫韻補庶矣傍音之類迄今無書學者引伸觸類可也自許慎以來同意相受考老爲轉注鄭玄以之而解經夾漈以之而成略遂失其本旨又若耆耆考耆耆孝耆六字皆從老省爲義以旨句勿占子至聲

今夾深以之入轉注之篇可乎哉又若以日月成
易而轉爲明以目少爲眇而轉爲省此又不達其
旨之尤者也按說文省从眉从𠂔徐曰𠂔徹也不
從少此夾深臆說

右趙古則所論其全見聲音文字通首云展轉其
聲而注釋爲他字之用可謂思過半矣末節所論
真中夾深之膏肓而起叔重之廢疾也然其云雙
音竝義不爲轉注者又云傍音叶音不在轉注例
者又非也雙音竝義傍音叶音皆轉注之極也極

則窮窮則變變則通蓋轉注爲六書之變而雙音
竝義傍音叶音又轉注之變也若曰不爲轉注則
當爲何事不在轉注例則何以例之是六書之法
有不盡而聖人之作遺餘力矣又當於六書之外
別立一法以括之乎茲余不得不辨者不敢以疑
網墮來哲也

三十六字母

司馬溫公作切韻指掌圖以三十六字母三百八
十四聲別爲二十圖極五音六律之變分四聲八

轉之異遞用則名音和傍求則名類隔同歸一母
則名雙聲同出一類則名疊韻同韻而分兩切者
謂之憑切同音而分兩韻者謂之憑韻韻無字則
點窠以足之謂之寄聲韻闕則引鄰以寓之謂之
寄韻

吳幼清曰三十六字母俗本傳訛而莫或正也羣
當易以芹非當易以威知徹牀孃四字宜廢圭缺
羣危四字宜增樂安陳晉翁以指掌圖爲之節要
卷首有切韻須知於照穿牀孃下注曰已見某字

毋下於經堅輕牽擎虔外出局涓傾圈瓊拳則宜
廢宜增蓋已瞭然矣

伯琦論轉注之誤

元周伯琦云象形指事文也會意諧聲字也轉注
假借文字之變也夫既知轉注爲文字之變是矣
而云轉注者側山爲阜倒之爲帀何哉若如其言
猶是常也豈得爲變側山爲阜亦是象形倒之爲
帀亦是會意豈所以解轉注哉

夏英公字書

夏英公集古篆韻所引書目汗簡說文石經字略
夏書籀韻雲臺碑豫讓文古孝經古周易古尚書
演說文雜古文林罕集古老子山海經古史記古
漢書孫彊集馬日磾集牧子文古世本義雲章古
莊子碧落文華岳文古案經張揖集亢倉子古爾
雅古論語古毛詩開元文李彤集古春秋古禮記
徐邈集三方碑茅君傳古樂章古周禮石棹文濟
南集馬田碑銀牀頌烟蘿頌荆山文庾儼集古月
令南嶽碑陰符經王庶子碑祝尚書韻比干墓銘

衛宏字說具丘長碑凌壇臺文季札墓銘滕公墓
銘周才字錄朱育集字樊先生碑義雲切韻羣書
古文楊大夫集天台經幢蔡邕石經王維畫記顏
黃門說庾儼字書證俗古文王先生誄彌勒傳碑
陳逸人碑楊氏阡銘鬱林序文周書大傳淮南子
上昇記王惟恭黃庭經趙璇章古字略王存義切
韻張庭珪劒銘裴光遠集綴郭昭卿字指李商隱
略古崔希裕略古丘光庭序文鳳栖記

楊用脩字書目

楊用脩聞見字書目石鼓文

鄭樵注王應麟注蘇軾注

史篇

說文

引九經韻補羣經音辨

賈昌朝

小爾雅

孔鮒

廣雅

張揖

要

雅

梁劉

賈升郎埤蒼

升郎漢永元中人

糾謬正俗

顏師古

通

俗文

說文五義

吳

說文系傳

徐

呂忱字林陸該

字林葛洪字苑曹產字苑御覽字府庾元威字府

鐘鼎欵識

薛尚功

集古錄

歐陽脩

博古圖考古圖

呂大

臨

金石錄

趙明誠

故跡遺文徐浩古跡記北齊李鉉字

辯李燾五音譜七音韻鏡宋吳恭字林音義張揖

誤字周成難字宋庠國語音智騫楚辭音徐邈莊

子集音甘輝魏包莊子釋音陶弘景黃庭經音孫
炎爾雅音釋玄應諸經音義蕭該漢書音義李舟
切韻董南一切韻指南晉王延文字音何承天纂
文阮孝緒文字集略李登聲類李季節音譜陸法
言集韻隋潘徽韻纂孫愐唐韻曹憲桂苑珠叢張
叅五經文字唐元度九經字樣夏竦古文四聲韻
趙克繼廣古文四聲韻郭忠恕佩觿集鄭樵字始
連環鄭樵象類書溫公切韻指掌圖孟昶書林韻
會黃公紹韻會舉要吳棫韻補顏元孫千祿字書

婁機廣千祿字書周琦六書正譌王隆小學篇說
文字原劉士明動靜字音唐蒙博物記李肩吾字
通洪适隸釋呂靜韻集周思言音韻文字辨疑夏
侯該韻略杜臺卿韻略楊休之韻略張揖古今字
詁阮孝緒古今文詁班馬字類丘陵文字指要郭
知玄集韻拾遺鄭氏篆隸戴侗六書故毛晃禮部
韻略劉淵平水韻韻總李涪刊誤陳思寶刻叢珠
書苑菁華王柏正始之音字謚隸格聲本聲緯
英公用脩有聞見字書目其未備者輒疏於

此

神禹碑李斯嶧山碑泰山碑秦望山碑詛楚文皇
象天發神讖碑石鼓音釋泉志古印式衛宏古文
宮書郭顯卿雜字指衛宏古文奇字僧曇域補說
文字解說文音隱說文韻補古今字書束皙發蒙
記楊承慶字統顧野王玉篇釋慧力像文玉篇趙
利正玉篇解疑司馬光類篇侯洪伯字類叙評謝
康樂要字苑馮幹括字苑葛洪要字苑殷仲堪
常用字訓賈魴字屬篇鄒里要用雜字王義文字

要記周成解文字薛立字宗文字譜江邃釋文王
情文字志王氏文字要說難字要覽郭訓字旨篇
桂林珠叢略要隋王劭俗語難字李少通雜字要
僧正度雜字書文字整疑正名顏延之詁幼荀楷
廣詁幼顏延之纂要文字釋疑戴規辯字李少通
今字辨疑顧愷之啟疑記啟蒙文字指歸唐武后
字海稽正辨訛僧智光龍龕手鑑僧寶誌文字釋
訓明皇開元文字音義唐歐陽融經典分毫正字
音書考源周研聲韻呂靜韻集張諒四聲韻林段

弘韻集羣玉典韻王該文章音韻李槩音韻李槩
脩續音韻決疑纂韻抄劉善經四聲指歸沈約四
聲夏侯詠四聲韻略趙氏韻篇李槩音譜釋淨洪
韻英陸慈切韻蕭鈞音韻武元之韻詮明皇韻英
顏真卿韻海鏡源僧智猷辨體補脩加字切韻李
邕唐韻要略雍熙廣韻丁度集韻禮部疑韻陳彭
年重脩廣韻吳鉉五音廣韻景祐韻王延雜文字
音陽休之韻略陽休之辨嫌音異字同音張推證
俗音顏愍楚證俗音略叙同音聲韻圖柳曜五音

切韻樞切韻指元論僧鑑言切韻指元疏劉伯莊
續爾雅曹憲博雅曹憲古今字圖雜錄李商隱蜀
爾雅劉溫潤羌爾雅蕃爾雅母昭裔音略陸佃爾
雅新義爾雅貫類宋世良字略徐鍇韻譜劉守錫
歸字圖僧守溫三十六字母圖僧宗彥四聲等第
圖僧行慶定清濁韻鈴切韻內外轉鈴內外轉歸
字郭逸音訣劉鎔經典集音劉伯莊史記漢書音
義徐文遠左傳音李玄植三禮音義公孫羅文選
音義陸德明經典釋文曹憲文選音義許淹文選

音句中正八體書雍熙廣韻王安石字說唐耜字
說集解劉原父先秦古器記張有復古編張有五
聲韻補汪藻古今雅俗字王宗道切韻指玄論倪
鏜六書類釋許謙假借論六書統六書精蘊四書
五經明音古今韻漢隸分韻梁有演說文李行中
字源李陽冰謙卦碑李陽冰新泉銘趙古則聲音
文字通正轉音略字學源流六書指南六書本義
王球嘯堂集古錄高衍孫五音總韻林罕字源偏
傍小說葛刪正續千文字要機漢隸字源劉球碑

本隸韻佐書韻編洪适隸釋石經遺字碑王楚鐘
鼎篆韻杜本華夏同音吾衍鐘鼎韻吾衍周秦刻
石釋音吾衍學古編吾衍續古篆韻吾衍疑字吾
衍說文續釋楊鉤鐘鼎篆韻宣和譜楊克一集古
印格王厚之復齋印譜顏叔夏古印譜姜夔集古
印譜趙孟頫印史王應電同文備考黃諫從古正
文楊慎六書索隱轉注古音略古音餘古音附書
學正韻字學集要田藝衡同文集李宗言釋字

歐公誤以八分爲隸

東魏大覺寺碑陰題銀青光祿大夫臣韓毅隸書
蓋今楷字也庾肩吾曰隸書今之正書也張懷瓘
六體書論亦云隸書程邈造字皆真正亦曰真書
自唐以前皆謂楷字爲隸歐公集古錄誤以八分
爲隸書

用脩誤解歲字

用脩云歲古卽遂字今文從步從戌年至戌而終
乃秦以十月爲歲首故制字从步戌前此未有也
按爾雅夏曰歲取歲星行一次也歲星行一次而

四時之功畢故年謂之歲從步者其躔度可推步也從戌者木星之精生於亥自亥行至戌而周天也謂其始於秦蓋誤

霓可兩音

霓說文屈虹青赤或白陰氣也雄曰虹雌曰霓研奚切又五結切南史沈約作郊居賦以艸示王筠讀至雌霓連蜷沈撫掌曰僕嘗恐人呼爲平聲范蜀公召試學士院用彩霓作平聲考試者判郊居賦霓五結切范爲失韻當時學者爲之憤鬱司馬

文正公曰約賦但取聲律便美非覓不可讀爲平聲也按韻書此類甚多有兩音三音而義同者皆可通用

卅卅卅三音

顏之推稽聖賦魏姬何多一孕四十中山何夥有子百廿二音入而集反說文二十并也俗音念者誤三十并爲卅音撒先合反四十并爲卅音錫先立反史記秦始皇諸刻石文四字爲句正用此今刻本一字改作二字黃花老人詩招客先開卅雙

郤一字讀作二字皆可笑也

甄有三音

甄有三音一在真韻之人切漢書甄表門閭靈貺
自甄之甄一在先韻稽延切左傳左甄右甄軍之
兩翼也一在震韻之丌切周禮典同薄聲甄注掉
也鍾病也殷寅玄元皇帝應見賀聖壽無疆詩應
曆生周日常祠表漢年無由同拜慶竊朴賀陶甄
自先韻旁入真韻

說文引孔子

說文引孔子之言甚多如狗叩也叩氣吠以守又曰視犬之字如畫狗也又曰牛羊之字以形舉也又曰黍可爲酒禾入於水也又曰推一合十曰士以一貫三曰王此類甚多豈叔重去古未遠別有所見邪抑孟堅所謂宗師仲尼以重其言邪

漢儒失制字之意

漢儒鄭玄賈逵杜預劉向班固劉熙諸人皆號稱博洽其所訓注經史往往多不得古人制字之意姑以釋親言之如云父矩也以法度教子也母牧

也言育養子也兄況也況父法也弟悌也心順行
篤也子孜也以孝事父常孜孜也孫順也順於祖
也男任也任功業也女如也從如人也姑故也言
尊如故也姊咨也言可咨問也夫扶也以道扶接
也婦服也以禮屈服也妻齊也與夫齊體也妾接
也以時接見也凡此率以已意牽合豈知古人命
名立義固簡而易盡乎今以六書及許慎說文攷
之蓋父字從丂從一丂卽手字一卽杖以手執杖
言老而尊也母字從女從兩點女而加乳象哺子

形也兄字從口從人象同胞之長以弟未有知而
諄諄誨之友愛之情也弟字上象丌角中象擎手
下象跂足不良于行義當從兄也子字上象其首
中象其手下象并足始生襁褓之形也孫字從子
從系子之系所以續祖之後也男字從田從力壯
而力田供爲子職也女字象兩手相揜歛足而坐
淑德貞閑也姑字從女從古齒德俱尊觀舅從白
可知也姉字從女從市市卽古紱字紱爲蔽膝義
取在前觀妹從未可知也夫字從天而出象妻之

所天也婦字從女從帚女而持帚承事舅姑之義也妻字從女從尚言女而上配君子也妾字從女從立女而侍立卑以承尊也細玩篆文其義立見乃湯不之省輒爲之附會其說亦鑿矣哉

韓詩誤解字

韓詩外傳云君者何也曰羣也爲天下萬物而除其害者謂之君王者何也曰往也天下往之謂之王先生何也猶言先醒也不聞道術之人則冥于得失不知亂之所繇眊眊乎其猶醉也按古文君

字問從門從口取端拱南面出命令而無爲之意
李斯小篆從尹從口許慎說文云從尹從口以發
號晉棹公曰臣之求君以出令也此君字之義也
董仲舒曰古之造文者三畫而連其中謂之王三
者天地人也而參通之者王也孔子曰一貫三爲
王李陽冰曰王者之王中一畫近上王者則天之
義此王字之義也師之稱爲先生謂聞道先乎吾
如樂克於孟子曰先生何爲出此言之類長老之
稱亦爲先生謂年齒先乎吾如孟子遇宋牼於石

丘曰先生將何之之類子之稱父亦爲先生謂其分之可尊如曾子有過曾皙引杖擊之仆地有間乃蘇起曰先生得無病乎之類君之稱臣亦爲先生謂其德之可尊如魯哀公聞冉有之言嘻然而笑曰寡人雖不敏請奉先生之教衛靈公聞子夏之言避席抑手曰寡人雖不敏請從先生之勇之類此先生字之義也古人制字每寓意於點畫之中觀此類可見矣乃以羣釋君以往釋王以先醒釋先生至如司馬遷班固鄭康成應劭劉熙之徒

諸所訓註此類非一則徒以聲之相近者而強釋之初不攷六書之本意其誤後人甚矣

繇有六義

繇有六義黃履翁云漢高帝繇咸陽則與徭同文紀無繇教訓其民則與由同百官表咎繇則與陶同李尋傳繇俗則與謠同韋孟詩犬馬繇繇則與悠同班固賦謨先聖之大繇則與猶同一字凡六用

率有五音

率有五音將率之率音帥孟子穀率左氏藻率唐
率更令皆音律量名音刷督率之率音朔算法約
數之率音類

敦有九音

敦有九音禮敦厚以崇禮音墩詩敦彼獨宿音堆
樂記樂者敦和音純詩敦彼行葦賈誼賦何足控
敦竝音團詩敦弓旣堅廣韻天子弓也音雕周禮
每敦一几敦覆也音幬周禮度量敦制注敦布帛
幅廣也音準周禮珠槃玉敦明堂位有虞氏之兩

敦音對爾雅敦丘如覆敦音鈍

離有十六義

離有十六義黃離倉庚也見說文離麗也離也者明也見易雉離於羅見毛詩大琴謂之離見爾雅釋流離鳥名見詩注前長離而後裔皇注長離鳳也是相如賦織離鳥名見李斯書陸離參差也見文選侏離夷語也見漢南蠻傳株離西夷樂名又設服離衛注陳也見左傳又離木名瑩冢中之樹見孔子世家又水名零離水東南至廣信入鬱林

見地理志又姓離婁見孟子又轉去聲不離飛鳥
不可須臾離也見禮記又轉力爾切輪囷離奇又
離靡廣衍見漢書

苴有十四音

苴有十四音七間切麻也子間切苴杖也又子旅
切履中薦也又布交切天苴地名在益州見史記
注又天苴與巴同又子邪切菜壤也一曰獵場又
似嗟切苴咩城在雲南又鉏加切詩傳曰木中傳
艸也水草曰苴字一作蒼又作泚今作渣非又都

賈切土苴不精細也又側下切糞艸也又側魯切
說文曰酢菜也酢古醋字又莊俱切姓也漢有苴氏又
則吾切茅藉祭也又將預切糟魄也又子余切苞
苴囊貨也

古字有通用假借用

經籍中多有古字通用及假借而用讀者每不之
察如易豐卦雖旬無咎禮記內則旬而見注皆釋
均不知旬卽古均字遯卦肥遯無不利肥古作𦵏
與蜚字同韻書訓別也則肥當從𦵏離卦離麗也

又云明兩作離禮昏經曰納徵束布離皮白虎通云離皮者兩皮也三五曆紀古者麗皮爲禮離麗古通用巽卦喪其資斧資當讀爲齊應劭云齊利也淮南子云磨齊斧以伐朝菌漢書王莽傳引易句資作齊資齊古通用艮卦艮其限列其夤厲熏心熏讀爲閹蓋艮爲閹也熏閹古通用歸藏易一與與讀爲坤卽古坤字書堯典方命圯族圯讀爲弊卽古弊字禹貢西傾因桓是來又和夷底績水經注和夷底績卽西傾因桓之桓漢書桓東少年

場注桓楹卽和表和表又轉爲華表桓譚新論隋志作華譚桓和華三字古通用又岷嶓旣執又岷山導江史記引此皆作汶三國志蜀後主測登觀坂觀汶水之流五代史王建貶衛尉少卿李鐬爲汶川尉徐無黨註汶讀作岷汶岷古通用五子之歌甘酒嗜音又儀狄作酒禹飲而甘之二甘字當讀爲酣古字省文微子沉酣于酒酣當讀爲醕音煦漢書趙充國傳醉醕羌人顏師古曰醉怒曰醕卽醕字回命伯回說文回作𠂔唐杜佑奏省官疏

云伯景爲太僕回璽古與景字同音亦相借耳詩
小序氓喪其妃耦妃當讀爲配妃配古通用國風
猗嗟名兮玉篇引名作顛眉目之間也西京賦昭
藐流盼一顧傾城注昭眉睫之間皆言美人眉目
流盼使人冥迷所謂一顧傾城也名顛冥三字古
通用小旻發言盈庭發讀爲聒發聒古通用碩人
鱣鮪發發發讀爲潑發古潑字省文小雅采芣平
平左右論語便便言皆訓辨給也堯典平章百姓
史記作便章百姓平便古字通用公劉芮鞠之卽

韓詩外傳作阮班孟堅云弦中谷丙水出西北東入涇注芮阮雍州川也師古云阮讀與鞠同古字通用蓼蕭爲龍爲光長發荷天之龍二龍字註皆釋寵也然不知卽古寵字省文隰有萇楚旖旎其華王逸云今詩作猗儺二字皆平聲楚辭紛旖旎於都房相如賦旖旎以招搖楊雄賦旃旒郅偁之旖旎王褒賦形旖旎以順吹旖旎卽古猗儺字殷頌武王載發發讀爲旆發旆古通用禮記月令審端徑術術讀爲遂術遂古通用又天子乃鮮羔開

氷鮮讀爲獻鮮獻古通用玉藻立容辨卑母調辨
讀爲貶辨貶古通用又盛氣顛實揚休顛讀爲填
顛填古通用一命縕鞞幽衡幽讀爲黝黝黑色幽
黝古通用少儀鸞和之美美讀爲儀美儀古通用
樂記名之曰建橐建讀爲展建展古通用祭義燔
燎羶羶羶讀爲馨香羶羶馨香古通用祭統百
官進徹之進讀爲餽進餽古通用投壺若是者浮
浮當讀爲罰浮罰古通用又籌空中五扶堂上七
扶公羊傳曰膚寸而合何休曰側手爲膚按指爲

寸扶讀爲膚扶膚古通用又王言如綸其出如綽
綽讀爲緋綽緋古通用周禮小司徒施其職而平
其政政讀爲征政征古通用賈師展其成而奠其
賈奠讀爲定奠定古通用司尊彝凡酒脩酌脩讀
爲滌脩滌古通用大宗伯攝而載果果讀爲裸音
灌果裸古省文司几筵每敦一几鄭玄曰敦覆也
敦讀爲燾敦燾古通用鬱人遂貍之貍讀爲埋貍
埋古通用大胥春入學舍采合舞舍讀爲釋舍釋
古通用典瑞繅藉五采五就以朝日繅讀爲藻繅

藻古通用巾車革路龍勒條纓條讀爲條條條古
通用又蒲蔽焚蔽藻蔽藩蔽爾雅輿前謂之輶後
謂之弗竹前謂之禦後謂之蔽通作弗蔽弗古通
用薙氏秋繩而芟之繩讀爲孕繩孕古通用考工
記梓人爲侯上兩個與其身个讀爲幹个幹古通
用輶人輶欲頡典頡典讀爲懇殄頡懇典殄古通
用函人犀甲七屬屬讀爲注屬注古通用又眡其
鑽空空讀爲孔空孔古通用慌氏以欄爲灰欄讀
爲練欄練古通用矢人以其筈厚筈讀爲橐筈橐

古通用匠人爲溝洫凡行奠水奠讀爲停奠停古
通用弓人爲弓老牛之角紾而昔昔讀爲錯昔錯
古省文又畏也者必撓畏讀爲隈畏隈古省文又
中有變焉故校校讀爲絞校絞古通用儀禮注布
八十縷爲一宗宗讀爲升宗卽古升字春秋宣公
九年晉卻缺救鄭成公十七年晉殺卻錡卻犇卻
至卻讀爲卻音隙漢有卻正晉有卻超卻鑒卻古
卻字左傳隱公元年衆父卒衆讀爲終衆終古通
用文二年穆伯及晉司空士穀盟于垂隴及士會

士燮士鞅士當作土傳譌耳又詩徹彼桑土土讀
爲杜土姓杜伯之後土卽古杜字省文宣四年闕
穀於菟班固叙傳引此菟作擇古通用襄二十五
年子產對晉云庸以元女大姬配胡公而封諸陳
以備三恪恪當讀爲客恪客古通用又衛侯入逆
于門者顙之而已說文顙低頭也徐氏曰點頭以
應也今作領襄八年亦不使一介行李告於寡君
介讀爲个介个古通用昭元年趙孟視蔭蔭讀爲
陰蔭陰古通用文元年享江芊而勿敬也又昭十

三年芊姓有亂必季實立今氏書有乚姓而無芊
姓諸韻書乚芊字同音皆訓羊出聲則知芊卽古
乚字昭七年隸臣僚僚臣僕僚當讀爲牢僚卽古
牢字昭二十五年隱民多取食焉國語勤恤民隱
而除其害也詩云如有隱憂隱當讀爲殷隱殷古
通用又公徒釋甲執冰而踞冰讀爲棚箭房之蓋
冰棚古通用定三年唐成公如楚有兩肅爽焉爽
讀爲霜爽霜古通用穀梁傳以伯宗爲伯尊賈逵
以宗盟爲尊盟與舜典禋於六宗宗亦爲尊宗尊

古通用國語王乃秉枹親鼓之離騷援玉枹兮擊
鳴鼓枹讀爲桴枹桴古通用論語多見其不知量
也多當爲祗正義云古祗字孟子海河之於行潦
潦讀爲滂潦滂古通用素問脉泣而血虛又云寒
氣入經而稽遲泣而不行又云多食鹹則脉凝泣
而變色泣讀爲澀泣澀古通用山海經帝俊妻是
生十日俊古舜字莊子膠膠擾擾膠讀爲攪膠攪
古通用賈誼過秦論信臣精卒陳利兵而誰何注
誰何問之也漢書有誰何卒注誰與譙通與高帝

譙讓項羽之譙同何與呵同譙呵如今關城盤詰
之例誰譙何呵古通用史記庾死獄中說文束縛
梓世爲吏庾吏古通用有盧綰之孫他人封亞谷
侯亞漢書作惡漢條侯周亞夫有玉印其文曰周
惡夫印亞惡古通用又尉佗曰使我君中國何渠
不若漢長安狹斜行丈夫且徐徐調弦渠未央淵
明詩壽考豈渠央黃魯直木穿石槃未渠透渠字
班史及古樂府王融三婦豔詩俱作遽字宋王楙
引庭燎詩注云夜未渠央渠當呼作遽謂夜未遽

盡也渠遽古通用漢紀紅女下機紅卽古工字太
史公論英布曰禍之興自愛姬生於妬媚以至滅
國又漢書外戚傳亦云成結寵妾妬媚之誅二媚
字竝讀爲媚媚亦妬也五宗世家云常山憲王后
妬媚王充論衡云妬夫媚婦生則忿怒鬪訟媚媚
古通用漢書兵難踰度踰讀爲遙卽古遙字又規
察規讀爲廉規覘視之義卽古廉字呂紀未敢訟
言誅之訟讀爲公古公字又孟光舉案齊眉張平
子四愁詩何以報之青玉案二案字卽古枕字又

思玄賦顓羈旅而無友兮顓讀爲獨顓獨古通用
百卉含葩葩讀爲花卽古花字言辯而確確讀爲
確確確古通用又白頭如新傾蓋如故說苑作白
頭而新傾蓋而故而如古通用秦方士徐市又作
徐福實一人也市讀爲黻古黻字黻福聲相近司
馬長卿大人賦上僊僊有凌雲之氣僊讀爲飄僊
飄古通用論衡云伍員帛喜帛喜讀爲伯詬帛伯
通喜古詬字省文又旱火變也湛水異也天官書
一湛一旱時氣也淮南子旱雲烟火涔雲波水又

云雖有涇旱災害之殃民莫困窮已也湛涇古通用淮南子人間訓置之前而不輦錯之後而不軒輦讀爲輕古輕字泰族訓無隱士無軼民又車有勞軼軼讀爲逸軼逸通又經誹譽以導之齊俗訓聽失于誹譽誹讀爲毀誹毀古通用又鳥窮則噉獸窮則羴噉讀爲喙噉喙通羴讀爲觸卽古觸字兵略訓吏民不相慘慘讀爲睦慘睦古通用又進退屈伸不見朕整整讀爲垠卽古垠字又昧不給撫呼不給吸給讀爲及給及通韓詩內傳已北耕

曰由呂氏春秋管子皆云堯使稷爲由錢譜神農
幣文農作由由農通風俗通恠神女新從聶家來
聶讀爲壻卽古壻字束皙補亡詩鮮侔晨葩莫之
點辱左思唐林兄弟贊二唐絜已乃點乃汚陸厥
荅內兄希叔詩旣叨金馬署復點銅龍門點卽古
玷字析里橋碑跋云驛散關之嶠潔史記張儀傳
杖而驛之韓信傳驛兵北首燕路洪氏載漢碑文
有云農夫驛耒又云辭榮驛黻驛卽古釋字管子
君臣上篇緝絕卽古充冕字又輕重甲篇鮑卽古

鵠字唐蘇頲朝覲壇頌乚虞氏乚讀爲稽古稽字
白樂天詩云誰教不相離相字讀爲厮相厮古通
用金大定中題燕靈王之枢作舊枢舊古通用此
類最多不可殫述苟讀如其字誤亦甚矣

古文多倒語

古文多倒語如息之爲長亂之爲治擾之爲順荒
之爲定臭之爲香潰之爲遂釁之爲祥結之爲解
坐之爲跪浮之爲沈面之爲背糞之爲除皆美惡
相對之字而反其義以用之如天地盈虛與時消

息以息訓長也亂臣十人亂越我家惟以亂民亂
爲四方新辟丕乃俾亂之類以亂訓治也安擾邦
國擾而毅擾龍六擾之類以擾訓順也荒度土功
遂荒大東大王荒之葛藟荒之以荒訓定也其臭
如蘭衿纓皆佩容臭胡臭亶時其臭羶臭陰達于
淵泉以臭訓香也是用不潰于成艸不潰茂以潰
訓遂也將以釁鍾以釁訓祥也親結其綱以結訓
解也則皆坐奠之而後取之以坐訓跪也越浮西
子于江以浮訓沈也馬童面之面縛銜壁面規渠

而改錯以面訓背也爲長者糞以糞訓除也

古逸經

初秦之咸學也書藏於屋壁後人收拾散滯遂已不全其後字則變古爲篆改篆爲隸書則縑以代簡紙以代縑愈遠而愈失真矣如采齊狸首見周禮河水祁招新宮響之柔矣雖有絲麻翹翹車乘俟河之清禮義不愆見春秋傳驪駒見漢儒林皆逸詩也伏羲作十言之教曰乾坤震巽坎離艮兌消息見左傳疏誣神者殃及三世見劉向傳建其

本而萬物理失之毫釐差以千里又勞而不伐有
功而不德厚之至也有一道大足以守天下中足
以守國家小足以守其身謙之謂也夫天道毀滿
而益謙不損而益之故損自損而終故益又天地
動而萬物變化見說苑其亡斯自取災見風俗通
地可觀者莫可觀于木見說文正其本萬事理失
之毫釐差以千里見東方朔化民有道對小人處
盛位雖高必崩不盈其道不恒其德而能以善終
身未之有也是以初登于天後入于地見鹽鐵論

皆逸易也民可近也而不可止也見周語聖作則
慎始而敬終終以不困見左氏維高宗報上甲微
見孔叢子大道亶亶其去身不遠人皆有之舜獨
以之見賈誼書禹七年水湯五年旱見墨子舜彈
五絃之琴歌南風之詩而天下治見風俗通大社
唯松東社唯柏南社唯梓西社唯栗北社唯槐厥
兆天子爵見白虎通前師乃鼓鼗譟見周禮大司
馬注將欲敗之必姑輔之將欲取之必姑與之見
國策不及貢以政接于有庠見孟子恃德者昌恃

力者亡見史記刑三百罪莫重于不孝見呂氏春秋母爲權首將受其咎又先其筭命見漢書說文引虞書仁閔覆下則稱昊天大傳引盤庚若德明哉湯任父言卑應言又引酒誥王曰封唯曰若圭璧文選注引周書王曰余不知九星之光周公曰日月星辰四時歲是謂九星皆逸書也半璧曰璜見周禮疏三皇禪云云五帝禪亭亭見文選注天子駕六馬諸侯駕四馬大夫三士二庶人一見王度記皆逸禮文也王居明堂位見正義瑞命見論

衡聘禮志見荀子皆逸禮篇名也文翰若采維周
成王時蜀人獻也見古今注逸周禮也玉粲之璚
今其璚音力猛也見說文古皆沒見風俗通如玉之
瑩見文選注璫璵魯之寶也遠而望之煥若也近
而視之瑟若也一則理勝一則孚勝見事類賦並
稱逸論語夫有意而不至者有矣未有無意而至
者也見法言人皆知糞其田而不知糞其心見說
苑三見齊王而不言事見荀子紂貴爲天子不死
曾不如匹夫是紂先自絕久矣非死之日天去之

也見伍被傳皇甫謐曰孟子稱禹生石紐西夷人也見史記六國表注舜生五十不失其赤子之心見鄭玄坊記注堯舜之道非遠人也而人不思之耳見桓寬論泰山之高參天入雲見文選注堯舜不勝其美桀紂不勝其惡見史通並稱逸孟子夫諸書漢儒劉向輩校定于前蔡邕輩鐫刻于後嗣是唐有大唐石經宋有三體石經可謂詳矣第不知漢初諸儒之所讐校者何書遂至遺逸如此先儒往往稱外國本曾見蜀有論語石經舉一隅下

有而示之三字必有我師焉下有我字後其食作
後食其祿唐玄宗亦改洪範無陂爲無頗凡此豈
孔壁旣出之後殘篇斷簡漢初諸儒攷校弗精以
致斯繆後人因而承襲之與

僞書

本草神農書也中言豫章朱崖趙國常山奉高真
定臨淄馮翊出諸藥物如此郡縣豈神農時所有
邪山海經禹益書也中有長沙零陵桂陽諸暨如
此郡縣豈禹時所有邪三墳伏羲神農黃帝書也

然謂封拜之辭曰策策始於漢而謂伏羲氏有策辭可乎祭天地於園丘大夫之妻曰命婦周禮始有之而謂天地園丘恩及命婦爲黃帝之事可乎相人之術起于衰世而謂聖人以形辯貴賤正賢否爲神農之書可乎三略六韜太公書也然其中雜援軍識以足成之夫讖書起于戰國之後太公之時曾有之乎中略之末謂三略爲衰世而作太公之佐文武果衰世乎六韜中其言多誣聖賢之甚竊孫吳之陳而謂太公爲之乎爾雅周公書也

然其中有云張仲孝友張仲宣王之臣也周公安
得載之爾雅左傳丘明書也然其中有云虞不臘
矣夫臘之爲節秦始有之丘明安得紀之左傳汲
冢周書也其周月解則以日月俱起于牽牛之初
夫自堯時日躔虛一度至漢太初曆始云日起牽
牛一度何周月而乃爾時訓解則以雨水爲正月
中氣夫自漢初以前曆皆以驚蟄爲正月中氣至
太初曆始易之以雨水何時訓而云然子華子程
本書也其語道德則頗襲老列之旨語專對則皆

倣左氏之文是何彼此之偶合作聲調似指漢武
朱鴈芝房之事喻子車復竊韓愈宗元墓銘之意
是何先後之相侔蒼頡篇李斯作也其曰漢兼天
下海內并厠希黥韓覆畔討威殘然則漢事何以
載於秦書列仙傳劉向作也贊云七十四人出佛
經然則釋教何嘗興于漢前此類甚多或摹古書
而僞作或以已意而妄增至使好事之流曲爲辯
釋以炫其博是皆未之深考耳

諺有自來

今諺云遠水不救近火此出韓非子以干求請託
爲鑽出班固答賓戲商鞅挾三術以鑽孝公以見
陵於人爲欺負出漢書韓延壽傳待下吏恩施厚
而約誓明或欺負之者延壽痛自克責曰不中用
此出史記始皇紀吾前收天下書不中用者盡去
之罵人曰老狗此出漢武故事上嘗語栗姬怒弗
肯謦又罵上老狗曰小家子出漢書霍光傳使樂
成小家子得幸大將軍至九卿封侯曰子細本北
史源思禮傳爲政當舉大綱何必太子細也罵人

爲獫奴本南史王琨獫婢所生曰附近古作傳近
仲長統昌言宦豎傳近房臥之內交錯婦人之間
形容短矮者俗謂之蓮文選有蓮脆之語唐書王
伾傳形容蓮陋蓋里巷常談其所從來遠矣

焦氏筆乘卷之六終